

**आकाशवाणी**

1. लोकसभा नै विकसित भारत रोजगार ते आजीविका गारंटी मिशन- ग्रामीण-विकसित भारत ग्रामीण विकास विधेयक जी राम जी 2025 पारित करी दिता। केन्द्रीय मंत्री शिवराज सिंह चौहान होरें आखेया जे मोदी सरकार नै मनरेगा स्कीम दी कारगर ढंगे सिर अमलावरी कीती।
2. प्रधानमंत्री नरेन्द्र मोदी होरें आखेया जे प्रवासी भारतीय साथ-सहयोग - सह-अस्तित्व दी जिंदी जागदी मिसाल न। उनें अपने दौरे दी त्री पड़ा ओमान च भारतीय समुदाय गी सम्बोधित कीता।
3. भारत ते ओमान बपार ते आर्थिक सहयोग गी मजबूत करने लेई आर्थिक सांझेदारी समझौते पर दस्तखत करंगन।
4. रक्षामंत्री राजनाथ सिंह होरें नमीं दिल्ली च वायु सेना कमांडरें दे सम्मेलन गी सम्बोधित कीता।
5. राष्ट्रीय जांच एजेंसी नै पिछले महीने दिल्ली च होए दे बम्ब धमाके आहले मामले च इक होर आरोपी गी गिरफ्तार कीता ।
6. दिल्ली दे पेट्रो पम्पें पर उनें गड़डियें गी तेल नैई थहोग जिंदे कश वैध प्रदूशन नियंत्रण प्रमाण-पत्र नैई होग।

<><><><><><>

**G RAM G BILL**

लोकसभा नै विकसित भारत – रोजगार ते आजीविका गारन्टी मिशन-ग्रामीण : विकसित भारत ग्रामीण विकास विधेयक-जी-राम-जी-2025 पारित करी दिता ऐ। एह विधेयक, 20 बरे पराने महात्मा गांधी राष्ट्रीय ग्रामीण रोजगार गारंटी अधिनियम-मनरेगा दी थाहर लैग। विधेयक दा मकसद विकसित भारत 2047 दे राष्ट्रीय दृष्टिकोण मूजब ग्रामीण विकास ढांचा कायम करना ऐ। इस विधेयक तैहत, हर माली बरे च हर ग्रामीण परोआर गी इक सौ 25 दिनें दी मजदूरी रोजगार दी वैधानिक गारंटी प्रदान कीती जाग। केंद्र ते राज्य सरकारें बशकार निधि बंटवारे दा अनुपात पूर्वोत्तर ते हिमालयी राज्यें गी छोड़िए सारे राज्यें आस्तै 60 ते 40 होग, जिसलै कि पूर्वोत्तर ते हिमालयी राज्यें च एह अनुपात 90 ते 10 होग। गां च सामाजिक आर्थिक बदलावें गी दिखदे होई केंद्र सरकार विकसित भारत जी राम जी विधेयक लेईए आई ऐ। नमें विधेयक दा मकसद श्रमिकें गी मते कम्म दिनें दी गारंटी बेहतर मजदूरी ते सुरक्षा प्रदान करना ऐ। मनरेगा दे तैहत

फिलहाल इक माली बरें च 100 दिन दे कम्म दी गारंटी दिती जन्दी ऐ, उर्थें गी नमें विधेयक च हर बरे 125 दिन दा रोजगार थहोग। एह विकसित भारत दी परिकल्पना दे मूजब ग्रामीण विकास दी गति गी होर बढ़ावा देग। कन्नै गै रोजगार दे मते मौके प्रदान करिए ग्रामीण परिवारें गी सशक्त बनाग। जेकर 15 दिन दे अन्दर अन्दर रोजगार उपलब्ध नेई कराया जन्दा ऐ, तां विधायक च बेरोजगारी भत्ता देने दा बी प्रावधान ऐ। केंद्रीय ग्रामीण विकास मंत्री शिवराज सिंह चौहान होरें विधेयक पर चर्चा दा परता दिन्दे होई आक्खेआ जे प्रधानमंत्री नरेन्द्र मोदी हुन्दी अगुवाई च मनरेगा योजना गी सेई ते असरदार ढंगै कन्नै लागू कीता गया ऐ। उन्नै आक्खेआ जे सरकार पैसा बचाना नेई चाहन्दी रोजगार देना चाहन्दी ऐ। ग्रामें गी विकसित बनाना चाहन्दी ऐ। इसदे आस्तै बजट च 1 लख 51 हजार 282 करोड़ रुपे दा प्रस्ताव ऐ।

श्री चौहान होरें आक्खेआ जे मनरेगा दे तैहत यूपीए सरकार नै छडा 2 लख 13 हजार करोड़ रुपे खर्च कीते हे, जिसलै कि मोदी सरकार नै 8 लख 53 हजार करोड़ रुपे सोयां मते खर्च कीते न। श्री चौहान होरें दस्सेआ जे यूपीए सरकार दौरान बरे 2006-07 सोयां 2013-14 तक इक हजार 660 करोड़ दिन दा रोजगार पैदा होआ, जिसलै कि एनडीए सरकार दौरान 3 हजार 210 करोड़ दिन दा रोजगार पैदा होआ। चौहान होरें आक्खेआ जे यूपीए दौरान इस योजना च महिलाएं दी हिस्सेदारी छडी 48 प्रतिशत ही, जिसी एन.डी.ए सरकार दे तैहत बढ़ाईए 56 प्रतिशत सोयां मता करी दिता गेआ ऐ। केन्द्रीय मंत्री होरें आक्खेआ जे नमा कानून सारे राज्यें गी न्या दोआग।

<><><><><><><><>

### Shanti Bill 2025

परमाणु ऊर्जा विभाग मंत्री जितेंद्र सिंह होरें अज्ज राज्यसभा च परमाणु ऊर्जा दे स्थायी इस्तेमाल ते उन्नति शांति विधेयक, 2025 पेश कीता। लोकसभा नै कल इस विधेयक गी संशोधन कन्नै पारित करी दिता। साहडे संवाददाता नै दस्सेआ ऐ जे शांति विधेयक दा मकसद देशवासियें दे कल्याण आस्तै परमाणु ऊर्जा दा विकास करना ऐ। इसदा मकसद इसदे सुरक्षित इस्तेमाल आस्तै इक मजबूत नियामक ढांचा प्रदान करना ऐ। इस विधेयक राए परमाणु ऊर्जा नियामक बोर्ड दे गठन ते परमाणु ऊर्जा निवारण सलाहकार परिषद दी स्थापना कीती जाई सकौग। एह विधेयक परमाणु हादसे दी स्थिति च केंद्र सरकार दी जवाबदेही तय करने दा भी प्रावधान करदा ऐ। केंद्र सरकार नै विधेयक तैहत अपनी जवाबदेही गी पूरा करने दे मकसद कन्नै परमाणु जवाबदेही कोष कायम कीता ऐ। विधेयक तैहत कायम सलाहकार परिषद केंद्र सरकार जां ए.ई.आर.बी. दे आदेशें या फैसलें दे खिलाफ अपीलें दी सुनवाई

करोग। इसदे च केंद्र सरकार गी रेडियो एक्टिव पदार्थ दी सुरक्षा आस्तै उपायें यां तरीकाकारें दा अधिकार दिता गेआ ऐ। एह केंद्र सरकार गी यूरेनियम या थोरियम दी खोज आस्तै अन्वेषण गतिविधियां चलाने दा बी अधिकार दिन्दा ऐ। एह विधेयक परमाणु ऊर्जा अधिनियम, 1962 ते परमाणु क्षति आस्तै नागरिक जिम्मेदारी अधिनियम, 2010 दी थाहर लैग।

<><><><><><><><>

### PM Maitri Parv

प्रधानमंत्री नरेन्द्र मोदी होरें आक्खेआ जे भारत दी विविधता, इसदी संस्कृति दा मजबूत आधार ऐ। श्री मोदी होरें आक्खेआ जे भारतीयें आस्तै हर दिन नमा रंग लेईए औन्दा ऐ, हर मौसम इक नमा त्योहार बनी जन्दा ऐ, हर परंपरा इक नमे विचार कन्नै औन्दी ऐ। प्रधानमंत्री होर अज्ज ओमान दी अपनी यात्रा दे दुए दिन मस्कत च मैत्री पर्व कार्यक्रम च भारतीय समुदाय ते छात्रें गी संबोधित करा र दे हे। प्रधानमंत्री होरें आक्खेआ जे भारतीय जित्थे बी जन्दे न ते जित्थे बी रौहन्दे न ओह विविधता दा सम्मान करदे न। उने आक्खेआ जे भारतीय प्रवासी सह-अस्तित्व ते सहयोग दी जिन्दी जागदी मिसाल ए।

ओमान च भारतीय शिक्षा प्रणाली दे 50 बरे पूरे होने दे मौके मौके पर 'मैत्री पर्व' कार्यक्रम दा आयोजन कीता गेआ। प्रधानमंत्री होरें मैत्री पर्व गी समुद्री विरासत, आकांक्षाएं नवाचार, विश्वास, प्रौद्योगिकी, सम्मान ते समावेशी विकास दे तौर पर दस्सेआ। उने आक्खेआ जे मैत्री पर्व दोनो मुखें दी दोस्ती, उनदे साझा इतिहास ते समृद्ध भविष्य दा उत्सव ऐ। इसदे तवा पैहले अज्ज बडलै प्रधानमंत्री होरें मस्कत च आयोजित भारत-ओमान व्यापार शिखर सम्मेलन गी संबोधित कीता। सम्मेलन च दोनो देशों दे शीर्ष उद्योगपति शामिल होए। उने आक्खेआ जे एह शिखर सम्मेलन दोनो मुखें बशकार दपक्खी सरबंघें दी नमी दिशा ते गति प्रदान करोग। उने आक्खेआ जे व्यापार जगत, मांडवी ते मस्कत गी जोड़ने आहली ऐतिहासिक समुद्री विरासत दा उत्तराधिकारी ऐ। उने आक्खेआ जे भारत ते ओमान बशअकार दोस्ती समें दे कनने होर मजबूत हुन्दी जा र दी ऐ। राजनयिक सरबंघें दे 70 बरें दा जिक्र करदे होई प्रधानमंत्री होरें आक्खेआ जे एह साझेदारी विश्वास ते दोस्ती पर आधारित ऐ। उने आक्खेआ जे हुन एह साझा विरासत पर केंद्रित इक समृद्ध भविष्य आहली भेठा अगगे बदा र दी ऐ।

<><><><><><><><>

### India Omaan

केन्द्रीय उद्योग मंत्री पीयूष गोयल होरें आखेया जे भारत ते ओमान बपार ते आर्थिक सहयोग गी मजबूत करने दे मकसद कन्नै व्यापक-आर्थिक सांझेदारी समझौते पर

दस्तख्त करगंन। ओमान दे उद्योग मंत्री कैस बिन मोहम्मद अल यूसुफ होरें भारतीय प्रतिनिधिमंडल दा सोआगत कीता ते दौनें मुखें बशकार मजबूत ऐतिहासिक सरबंधें ते भविक्ख दे विकास आस्तै सांझे नजरिए पर लो पाई। केन्द्रीय मंत्री पीयूष गोयल ते ओमान दे उद्योग मंत्री कैस बिन मोहम्मद अल यूसुफ बड़े चिरे थमां बलगे जा करदे व्यापक- आर्थिक सांझेदारी समझौते पर दस्तख्त करगंन। इस दौरान कई सारे कारोबारी बी उत्थे मौजूद रौहगंन।

<><><><><><>

### **NPCDCS**

प्रधानमंत्री हुंदे दफ्तर च राज्यमंत्री डाक्टर जितेन्द्र सिंह होरें आखेया जे सरकार नै बड़े मते महत्वै आहले जत्न NPCDCS दी शुरुआत कीती ऐ। सरकारै कैंसर-डायबटीज-Cardiovascular –बमारियें ते Stroke दी रोकथाम ते एदे थवां बचास बारे राश्ट्रीय कार्यक्रम NPCDCS तैहत मुखे च हर जिला अस्पताल कैंसर दा इलाज मुहेइया करोआने बारे जत्न दी शुरुआत कीती ऐ। राज्यसभा च प्रश्नकाल दौरान परते च मंत्री होरें दस्सेया जे सरकारै 372 दिक्खभाल सरबंधी कैंसर केन्द्र यानि Day Care Cancer Centres हर जिला अस्पताल च अगले त्रंऊ बरे च कायम करने दी योजना बनाई ऐ।

<><><><><><>

### **Defence Minister**

रक्षा मंत्री राजनाथ सिंह होरें आक्खेआ जे ऑपरेशन सिंदूर नै भारत दी घट्ट समें च उच्च-प्रभावशीलता कन्ने अभियान चलाने दी क्षमता दी दस्सेआ ऐ। नमी दिल्ली च वायु सेना कमांडरें दे सम्मेलन गी सम्बोधित करदे होई सिंह होरें ऑपरेशन सिंदूर दौरान भारत दी वायु रक्षा प्रणाली ते दूए उपकरणें दे असरदार इस्तेमाल दी सराहना कीती ते कमांडरें कन्ने भविक्ख दी चुनौती आस्तै ऑपरेशन थवा सिक्ख लैने दा आग्रह कीता। उने भारतीय वायु सेना दे जज्बे, फौरी कारवाई ते सटीकता दी सराहना कीती, जिसदे कन्ने ओने ऑपरेशन दौरान आतंकी कैपें गी नष्ट कीता ते हमलें मगरा पाकिस्तान दी “गैर-ज़िम्मेदार प्रतिक्रिया” गी असरदार ढंगे कन्ने संभालेआ। रक्षा मंत्री होरें आक्खेआ जे भारतीय वायु सेना भविक्ख-उन्मुख सेना ऐ, जेडी अज्ज दे समें राश्ट्रीय हितें दी राखी करा र दी ऐ। सिंह होरें इस गल्ला पर ज़ोर दिता जे 21मीं सदी च युद्ध छडा हथियारें कन्ने नेई सगुंआं विचारें, प्रौद्योगिकी ते अनुकूलन क्षमता दे माध्यम राए हुन्दा ऐ। उने आक्खेआ जे सरकार सशस्त्र बलें दे आधुनिकीकरण आस्तै स्टार्ट-अप ते एम.एस.एम.ई. सनें निजी क्षेत्र कन्ने रलिए कम्म करा र दी ऐ ते आई.डी.ई.एक्स. ते अदिति जनेई पैहलें दे राएं युवा प्रतिभाएं गी रक्षा विनिर्माण च शामिल करा र दी ऐ।

<><><><><><><><>

## Security Markets Code Bill 2025

केन्द्रीय वित्त मंत्री निर्मला सीतारमण होंरें अज्ज लोकसभा च Securities Markets Code बिल 2025 पेश किता ऐ। इस बिल गी सरबन्धित कन्ने च बदलाव आनने आस्तै पेश किता गया। इसी पेश करने मगरा एहदी अग्गे दी जांच करने लेई इसी वित्त सरबन्धी संसदीय स्थायी समीति गी अग्गे भेजने दा प्रस्ताव रक्खेया गया। निर्मला सीतारमण होंरें लोकसभा दे अध्यक्ष गी एहदे लेई फैसला करने आस्तै आखेया। इस बिल गी पेश करने थमां पैहले कांग्रेस दे मनीष तिवारी ते DMK दे अरुण नेहरु होंरें इसी पेश कीते जाने दा विरोध किता।

<><><><><><><><>

## Airport Network

भारत च ब्हाई अड्डे दी गिनतरी 2014 दी 74 कोला बढियै अज्ज 160 होई गेदी ऐ ते इयां “उड़ान” स्कीम दे तैहत क्षेत्रीय ब्हाई सम्पर्क च बाद्दा करने दी बदौलत मुमकिन होई सकेया ऐ। इस स्कीम गी 2016 च शुरू कीता गया हा तां जे ऐसे दूर-दरेडे इलाके तोड़ी बी ज्हाजें दी आओ-जाई शुरू होई सकै- जित्थे कदे ज्हाज जाई गै नैई हे सकदे। एह जानकारी अज्ज लोकसभा च सिविल हवाबाजी दे मंत्री राममोहन नायडू होंरें प्रश्नकाल दौरान दिती। उनें आखेया जे सरकारें मजूदा ब्हाई पट्टियें गी ज्हाजें दे उतरने-डोआरी भरने दे प्रमुख केन्द्र दे रुपै च तब्दील करी दिता ऐ।

<><><><><><><><>

## NIA Delhi Blast

राष्ट्रीय जांच एजेंसी NIA नै पिच्छले महीने दिल्ली च होए दे कार बम्ब धमाके आहले मामले च इक होर आरोपी गी गिरफ्तार कीता ऐ। NIA दा आक्खना ऐ जे इस मामले च गिरफ्तार इस में आरोपी दी पंछान शोपिया दे बसनीक यासिर अहमद डार दे रुपे च 9 कीती गी ऐ। उसीNIA दी टीम नै दिल्ली थमां गिरफ्तार कीता ऐ। आतंकवाद रोधी एजेंसी नै लाल किले कश होए दे आतंकवादी हमले च ओदी शमूलियत दी गल्ल आक्खी ऐ। इस हमले च 11 लोक मारे गे हे ते कैई होर घायल होए हे। राष्ट्रीय जांच एजेंसी दे मुजब यासिर डार इस मामले दे होरनें आरोपियें दे नेइमे सम्पर्क च हा- ओ इस हमले च मारे गेदे उमर -उन-नबी दे बी सम्पर्क च हा।

<><><><><><><><>

## No PUC No Fuel

राजधानी दिल्ली दे पेट्रोल पम्पें उनें गड़डियें गी तेल देना बंद करी दिता ऐ- जिंदे कश वैध प्रदूषण नियंत्रण PUC प्रमाण-पत्र नई ऐ। PUCC ते नियमें दी पालमा दी निगरानी कैमरा आधारित प्रणाली कन्ने कीती जा'रदी ऐ। दिल्ली सरकार नै राजधानी च निर्माण सामग्री आनने आहले ट्रकें पर बी पूरी चाली पाबंदी लाई दिती ऐ। इसदे इलावा अज्जै थवां BS-6 कैटेगरी थमां घट्ट आहली निजी गड़डियें गी राजधानी च प्रवेश नई थोग। हालांकि CNG ते इलैक्ट्रिक गड़डियें- सार्वजनिक गड़डियें ते जरूरी सेवाएं च लग्गी दी गैर BS-6 गड़डियें पर पाबंदी लागू नई ऐ।

<><><><><><>

## Badminton

बैडमिन्टन च भारत दे सात्विक साईराज रंकी रेड्डी ते चिराग शेटी दी जोड़ी चीन च BWF World Tour दे फाईनल च इंडोनेशिया दे फजर Alfian ते मुहम्मद शोहीपुल फिकरी दा सामना करोग। भारतीय जोड़ी नै अपने अभियान दी शुरुआत ग्रुप-बी दे पैहले मुकाबले च चीन दे यांग वांग दे वेई केंग लियांग खिलाफ जित कन्ने कीती ही।

<><><><><><>

## Security Conference

जम्मू-कश्मीर दी सुरक्षा बारे बक्ख-बक्ख पैहलुएं दा जायजा लैने लेई- केन्द्र शासित प्रदेश सतह दा इक सुरक्षा सम्मेलन अज्ज उपराज्यपाल मनोज सिन्हा हुंदी अध्यक्षता च शुरू होआ। एह कांफ्रेंस राष्ट्रीय पुलिस दे महानिदेशकें ते महानिरीक्षकें दी मजूदगी च चलै'करदी ऐ। एह कांफ्रेंस जगदी स्थित IIT कैम्पस च शुरू होई- जेहदे च पुलिस महानिदेशक नलिक प्रभात हुंदे इलावा पुलिस- बी.एस.एफ ते सी.आर.एफ दे महानिरीक्षक ते खूफिया ते होरनें विभागें दे अधिकारी बी हिस्सा लै'करदे न। सम्मेलन दौरान समूलचें जम्मू-कश्मीर च सुरक्षा स्थिति ते वबस्थाएं दे बक्ख-बक्ख सब्बनें पैहलुएं पर सोच-विचार कीता जाहग।

<><><><><><>

## Amrit Bharat Stns

रेल मंत्रालय नै जम्मू-कश्मीर च “अमृत भारत स्टेशन” स्कीम तैहत नमें सिरिया विकसित करने लेई 4 रेलवे स्टेशनें दी शनाख्त कीती ऐ। आकाशवाणी दे जम्मू संवाददाता नै जानकारी दिती ऐ जे इस बारे रेलमंत्री अश्विनी वैष्णव होरें लोकसभा च

दस्सेया ऐ जे जम्मू-कश्मीर दे जम्मू तवि- शहीद कैप्टन तुषार महाजन रेलवे स्टेशन उधमपुर- श्री माता वैष्णो देवी दे कटड़ा ते बडगाम रेलवे स्टेशन गी एहदे लेई तालेया गया ऐ। उनें लोकसभा गी जानकारी दिती जे मुख्यै च 160 रेलवे स्टेशनें दा कम्म पूरा होई चुके दा ऐ ते जम्मू-कश्मीर च बी इनें चौनें स्टेशनें पर निर्माण कम्म काफी हद तगर पूरा करी लैता गेदा ऐ जिसलै कि बाददू सुविधाएं गी जोड़ने दा कम्म चलै करदा ऐ।

<><><><><><>

### **Railway Network Electrification**

केन्द्र सरकार नै घोषणा कीती ऐ जे जम्मू-कश्मीर च रेलवे दे सारे ब्रॉडगेज नैटवर्क पर 100 प्रतिशत बिजलीकरण दा कम्म पूरा करी लैता गेदा ऐ- जेहड़ा जे केन्द्र शासत प्रदेश च रेल ढांचागत विकास दे कम्म च इक मील दा पत्थर ऐ। आकाशवाणी दे जम्मू संवाददाता नै दस्सेया ऐ जे अज्ज लोकसभा च इक सोआलै दे लिखित परते च रेलमंत्री अश्विनी वैष्णव होरें जानकारी दिती ऐ जे मुख्य भरै च रेल रस्ते दे बिजलीकरण दा कम्म मिशन मोड़ च कीता जा'रदा ऐ ते जम्मू-कश्मीर उनें चुनिंदा राज्यें ते केन्द्र शासत प्रदेशें च शामिल ऐ- जित्थे मजूदा ब्रॉडगेज पर लाइनें पर बिजलीकरण दा कम्म मुकम्मल करी लैता गेदा ऐ। मंत्री होरें साफ कीता जे पूरे मुख्यै च रेल मार्ग गी पूरी चाल्ली बिजली कन्ने चलने आहला बनाने दा मकसद रेल ट्रांसपोर्ट गी मता कुशल बनाना- डीज़ल पर निर्भरता घट्ट करना ते रेलवे गी कुदरत दे अनुकूल बनाना ऐ।

<><><><><><>